

經  
學  
博  
采  
錄

經學博采錄卷八

南海桂文燦

孫惕齋明經經世字濟侯福建惠安人也力學砥行著書等身嘗與門徒講論口授注疏未嘗檢本論六書檢說文舉手卽得其字其精熟如此又嘗言吾人治經非以矜淹洽爲他日當治人也治人當先自治苟不能自治徒治經何益居父母喪不飲酒食肉不居內者六年泉俗好鬪大姓爲甚漸漬身教竟爲仁里可謂篤實君子矣所著有十三經正讀定本八十卷春秋例辨八卷爾雅音疏六卷孝經說二卷夏小正說一卷釋文辨證十四卷經傳釋詞續編八卷說文會通十六卷韻學溯源四卷詩韻訂二卷惕齋經說六卷讀經校語四卷其通經略一篇則纂集古今

治術本於經術者以明窮經致用之方共數十卷尙未成  
書四書集解十二卷周易本義發明十二卷小學輯記近  
思錄附注性理輯義共若干卷甘泉薛子韻秀才嘗著說  
文答問疏證六卷以博洽稱明經爲之補箋語多精審道  
光庚寅君應歲試使者奇其文詢所學博辨切至遂舉辛  
卯優行第一貢成均及抵都則病嗽轉成脚氣年僅五十  
精力未衰竟以五月二十日卒於都中

包季懷孝廉世榮安徽涇縣人也嘉慶末治毛詩者十有  
四年寒暑不輟成訓詁八卷草木二卷鳥獸一卷蟲魚一  
卷輿地一卷名曰學詩識小錄述吉凶典禮器服樂章者  
又十卷未有大名共二十二卷四十餘萬言識小錄十三  
卷中唯輿地一卷未經君自寫定述禮十卷則初稿數欲

焚棄而幸存故笥者考訂詳明徵引賅洽可謂善述之儒  
已君以治經博覽載籍尤好荀子楚詞呂覽史記班范陳  
三史通典通鑑每歲必流覽數過性廉介旅居揚州閉戶  
不通人事者二十年善取友與甘泉薛傳均子韻儀徵劉  
文洪孟瞻旌德姚配中仲虞同志趣講貫至久故論交尤  
篤年十九始應童子試入試始補府學附生五試鄉舉至  
道光辛巳始以經藝醇茂策問詳贍中舉人丙午應禮部  
試報罷南歸於九月十八日卒於揚州孝廉有族子名慎  
言字孟開道光甲午舉人亦通經學著有讀孟偶詮公羊  
隅見各若干卷性孤高目空一切壬子之夏於陳卓  
人比部座上晤之觀其言論蓋欲竊比東原戴氏而學識  
遠不及云

汪小城茂才穀江蘇儀徵縣學生也質脆弱性和易居家  
藹如接人退然如不及唯力學則精銳強悍進而不止不  
欲後古人弱冠卽鄙棄俗學委心許鄭集殘缺以求會通  
有齟齬不相入者則旁稽博討鉤深洞賾常達旦不寐又  
以掣經擘史要領多在輿地故記簡質後儒各爲歧說紛  
出無依據唯近世之圖精審據以爲本比羣籍而究事情  
口指手畫必得顯證而後已尤工書約鍾梁隸法爲真行  
風發踴厲有不可控勒之勢與同志友丹徒汪沅芷生甘  
泉薛傳均子韻儀徵劉文淇孟瞻寶應劉寶楠楚楨涇包  
慎言孟開旌德姚配中仲虞儀徵王僧保西御江都梅植  
之蘊生丹徒柳興思賓叔甘泉楊亮季子儀徵吳廷鵬熙  
載王翼鳳句生互相砥礪共爲實學乃積勞致咯血道光

通經非因經存文也然而諸家撰著之精亦藉是萃聚不致散逸是書嘉惠藝林之意不甚盛歟

歙縣汪孝廉名龍字叔辰乾隆丙午舉人也嘗讀詩生民元鳥二篇疑鄭箋述乳卵生之說不若毛傳謂姜嫄簡狄從帝嚳祀郊禘之說爲正遂博稽傳箋異同用力於是經者數十年成毛詩異義四卷毛詩申成十卷毛傳辭義簡質師授甚遠獨得詩之正傳而鄭君箋詩又在注禮之後學益深邃均有未易訾議者自唐人作疏不能辨別源流後之讀詩者從毛從鄭均或未安孝廉意主述毛而立論必持其平一字之異必詳考而證明之嘗作異義述曰鄭注周禮封人設其楅衡謂楅設于角衡設于鼻及箋詩夏而楅衡則同傳以爲楅衡其牛角爲其觸觶人說文解字

云楹以木有所逼束也衡字注云牛觸橫大木其角是楹  
衡本一事禮注分之不若詩箋爲當矣然則鄭於傳義其  
有不同殆非苟爲異者顧橫棧箋不以六師爲六軍孔氏  
稽之鄭志謂非定解由所注者廣未及改正卽是以思其  
得無異所不當異者乎而正義申述又或異其所同或同  
其所異是蓋不可以無辨也又曰正義釋文所據經本復  
各不同其所申解亦或有異且有誤解經義而自異於毛  
鄭者是又不可以不考也又今本鄭氏詩譜多譌脫孝廉  
據各書所引校補錄附異義之後孝廉說詩其精者萃於  
異義歿後弟子鮑方渠刊以行世而其申成一書徵引極  
爲詳備王拔萃鼎祚珍藏之惜乎其未並梓也孝廉尤熟  
於許氏說文所著書數自手寫點畫悉宗六書無一筆苟

年過七十交於段大令王裁得其注說文復將異義補正若干條重寫定本而大令亦多采其說入說文注生平安貧樂道絕不干預外事而當事者高其學每造訪其廬嘗修徽州府志所定體例簡嚴後之爲志書者不能及也又嘗主講徽州郡城古紫陽書院道光三年十月十五日卒卒年八十有二孝廉於儔輩少所許可唯與同邑舉人方椿友善椿字子橋事生母張極孝性剛介不苟隨俗俯仰急人之難待友至誠潛心六書通漢儒箋注藏書萬卷手自校讐著有楚頌山房詩文集十卷敘藝文志四卷亦績學之士也

高郵王文肅尙書名安國字書城雍正二年進士由翰林厯官至吏部尙書十二年提督廣東肇高學政舊制院門



嚴啟閉尙書曰人之欲實在心苟無欲雖日啟何患乃設  
西齋延見諸生令長揖不拜使知重廉恥長氣節自是士  
子俗習盡除文風丕變阮太傅稱尙書以清正立朝以經  
術教子故尙書之子經學最爲精博而不知尙書重門洞  
開虛懷下士故戴東原策蹇至京師尙書卽延致家塾俾  
授公子以經也公子名念孫字懷祖晚號石臞乾隆四十  
年進士由翰林改主事官至直隸永定河道胸懷高淡吐  
棄一切嗜古著書精於訓詁以魏張揖廣雅舊無注者乃  
蒼萃漢魏故訓爲疏證二十卷間觀察之爲是書也日課  
疏三字罔間寒暑閱十餘稔乃成實爲小學家不可少之  
書又以子史中微文奧義研究者少患傳本訛脫日甚乃  
取管子淮南子國策史記等書詳加釐訂方將以次別錄

所校於簡爲讀書雜誌八十四卷考證精確文詞尤爲雅善觀察之子名引之字伯申一字曼卿嘉慶四年進士由翰林官至工部尙書諡文簡自幼究心爾雅說文音學五書者有年得其要領侍養京邸聆承庭訓貫通眾說益得指歸厥後師友一堂凡有著作互相考覈觀察著廣雅疏附文簡之說文簡所著所著經義述聞援據精確持論名通不爲墨守之學久已傳布藝林所著經傳釋詞專釋語

詞虛字開萬古未有之涂徑薈萃眾解津逮後人足補爾雅之闕學者誠能卽是書而詳考之於經義固無扞格而讀子史讀古書無不迎刃以解其功實與爾雅相等也文簡之子名壽同字子蘭亦深經學道光二十四年會試書藝題爲同律度量衡本鄭君陰律陽律之說成進士改刑

部出爲湖北漢黃德道咸豐二年紅巾賊陷武昌捐軀完  
節洵不愧家學矣

嘉慶十有九年甲戌二月桐城張阮林孝廉卒於京師族  
次其卒之前數日出所著左傳杜注辨證投涇縣胡墨莊  
觀察屬爲刪訂觀察寫副藏焉而原書仍歸其家是書初  
名左傳刊杜段茂堂謂其過激乃易今名經韻樓集中有  
左傳刊杜序卽是書也左傳自當陽集解出而賈服諸家  
之義盡亡近續溪胡樸齋明經匡衷嘗撰左傳翼服一書  
凡古義之異於杜者一一引申之宋以前諸書引古注有  
與杜注同者亦爲錄出以明杜氏之所本蓋集解多承舊  
說其自撰新意往往紕繆難通孝廉是編憤杜氏之襲舊  
而不著其名又如長厯非法短喪誣禮是大乖於經義乃

博采眾說以糾正之微引繁富誠治是經者考訂之資也  
孝廉銳於著述博聞多識六經子史罔不尋覽卒以爲學  
過勤撓疾以終深可惜已孝廉所著書已刻者有經史質  
疑錄一冊語多有補於經義如爾雅釋山小山別大山鮮  
釋文引李巡云大山少故曰鮮詩皇矣正義引孫炎曰別  
不相連也金誠齋云鮮斯聲近而通鮮亦斯字之借釋言  
云斯離也別與離義同文選吳都賦及長笛賦注並引爾  
雅小山別大山嶰玉篇云嶰山不相連也孝廉曰古本鮮  
當作解後人加山孫炎注不相連此正釋解字之義李巡  
不悟而曰大山少此何言歟又文選南都賦注引爾雅曰  
茆鳧葵六字今本釋艸無此文孝廉曰余讀詩薄采其茆  
傳曰茆鳧葵也毛傳多本爾雅且以南都賦注證之疑釋

有明先生集卷三  
艸蓆菟葵芹楚葵之間脫去茆鳧葵三字其他說經語多  
類此未刻者尙有漢晉各家逸史內謝承後漢書王隱晉  
書俱已輯有成本又有傳巖詩集八卷專學少陵云孝廉  
之疾也姚孝廉幼椿與偕卧處躬候湯藥其卒也徐樛亭  
農部及幼椿孝廉經紀其喪殯殮盡情不辭勞瘁可謂篤  
朋友之誼已孝廉諱聰咸字阮林一字小阮嘉慶庚午舉  
人也

梁教授名序鏞字健昌一字雲門晚更號研農老人吾粵  
南海人也賦性明敏羣經各史諸子語錄陰陽堪輿金匱  
算術下及道藏釋藏皆博覽之嘉慶庚申舉於鄉丁丑成  
進士並出歸安姚文僖尙書之門蓋傳其學例選知縣以  
母老改就教職選授韶州府教授訓諸生如子弟請業者

踵相接新進生員舊有印金以爲非師儒體概不問蔡生  
有年貧甚並贄亦卻之蒞任一載卽引疾歸部人士戴若  
山斗生祠於相江書院教授峻辭不獲云道光癸巳水災  
甚當事舉行平糶鄉有貧不能糴者乃改平糶爲散賑惠  
無不徧人咸德之居鄉排難解紛誘掖後進忘倦自奉薄  
而樂賙卹家徒四壁授徒自給口不言貧先儒胡大靈云  
接物以和持己以介教授嘗稱之洵不愧斯言矣所著有  
周易引史四書典鈔史記詳批酒志詩文集共若干卷皆  
未梓文燦欲編各種爲梁教授遺書刊之教授之子汝琛  
珍藏之不果教授有弟子曰何石卿名若瑤番禺人也道  
光二十一年進士官詹事府贊善深於公羊春秋之學所  
著不輕示人云

郝戶部懿行字恂九號蘭皋山東棲霞縣人也嘉慶己未進士官戶部主事戶部爲人恂恂謙退訥若不出口然自守廉介不輕與人晉接遇非素知者或相對竟日無一語談論經義則喋喋忘倦所居四壁蕭然庭院蓬蒿常滿僮僕不備戶部處之晏如浮沈郎署視官之榮悴若無與於己者而一肆力於著述所著書有爾雅義疏十九卷春秋說略十二卷春秋比一卷山海經箋疏十八卷竹書紀年校正二卷晉宋書故一卷宋瑣語二十篇補宋書刑法志食貨志各一篇荀子補注二卷雜問一卷記海錯一卷燕子春秋一卷蜂衙小記一卷通俗文疏證通姓錄晉文鈔曬書堂雜文雜記各若干卷戶部嘗曰爾雅邵氏正義蒐輯較廣然聲音訓詁之原尙多壅闕故鮮發明今余作義

疏於字借聲轉處詞繁不殺殆欲明其所以然然言之既多有所得必有所失矣又曰余田居多載遇草木蟲魚有弗知者必詢其名詳察其形考之古書以徵其然否今茲疏中其異於舊說者皆經目驗非憑胸臆此余書所以別乎邵氏也戶部之于爾雅用力最久稿凡數易垂歿而後成於故訓同異名物疑似必詳加辨論故所造較邵氏爲深文燦嘗聞之陳先生曰澧少時聞林月亭曾勉上兩學正並言郝氏爾雅義疏原稿所說通轉甚爲詳備道光初阮太傅會攜至粵兩學正并見之至刊皇清經解時嚴厚民上舍概行刪之咸豐初海州陳碩輔明經別刊郝疏單行之本仍依皇清經解本刻之惟咸豐六年楊至堂河帥以增刊單行郝疏於蘇州悉依郝氏原文較嚴氏刪本尚多十春秋說略序例謂說春秋者不得妄生褒貶春秋直書其事褒貶自見又謂春秋皆以實錄多一字少一字皆事實如此非聖人意爲增減蓋亦戶部得意之作也山



海經竹書紀年傳習者希每爲後人譌亂戶部於山海經  
援引各籍正名辨物訂其謬謬於紀年則據唐以前書所  
引比附校勘使秩然就緒殆昌黎韓氏所謂味於眾人之  
所不味者己亥之歲戶部以養病輟爾雅業瀏覽晉宋史  
書撰書故瑣言補志又鈔晉文百數十首謂王右軍虛談  
廢務浮文妨要二語切中當時之弊所鈔屏黜虛浮一以  
切實爲主其自作雜文亦出入漢魏晉宋之間雜記數表  
旁徵稗說間采時事意主勸戒似其鄉漁洋山人雜著其  
參稽古訓正荀子楊注之誤靜觀物態作燕子春秋蜂衙  
小記皆本說雅緒餘而記海錯一冊尤足以補證禹貢疏  
此戶部著作之大凡也戶部淹抑郎署二十七年貧病相  
侵道光乙酉竟卒於官戶部繼配宜人王氏名照圓字瑞

玉號婉侖博涉經史撰列女傳補注列仙傳校正詩經小  
記戶部卒後輯其遺書以求彰顯於世是亦可尙異者也  
吾粵高要馮展雲學士提學山東訪戶部之遺書捆載京  
師以貽同好又以戶部之文孫充儒學生其扶微拯墜殷  
殷若恐不及文燦從學士篋中盡讀戶部遺書而略述之  
如此

番禺黎君永椿字震伯陳蘭甫先生授經弟子也明敏篤  
實好讀古書家貧爲弟子師以自給治經學深於輿地所  
著有禹貢圖說周禮職方山川圖考各一卷皆以國朝康  
熙乾隆兩朝內府輿地圖證明班志鄭注之某山水某地  
爲今之某山水某地考輿地者惟此乃得其實詩幽風七  
月箋及周禮籥章注並有幽風幽雅頌之說君謂七月

備風雅頌體序本有此義鄭說實本諸序耳序云七月陳  
王業也周公遭變故陳后稷先公風化之所由致王業之  
艱難也而關雎序云雅者正也言王政所由廢興也此言  
陳王業亦王政廢興之義此乃備雅體之證序言故陳后  
稷先公風化之所由此乃備風體之證序言致王業亦謂  
王業能致於成功之意此乃備頌體之證鄭君深明序義  
故爲此說但序乃總論之體蓋總八章而言其備風雅頌  
諸體非僅指一章言也乃不善讀鄭說謂鄭君注禮箋詩  
俱僅指一章而言則簡章注所指于耜舉趾饁彼南畝爲  
雅祈年時豈僅歌此數句而已乎七月箋所指穫稻作酒  
以介眉壽而雅豈又歌此數句而已乎箋又指女心傷悲  
殆及公子同歸爲風迎氣時豈僅歌此數句而已乎蓋鄭

君亦不僅指一章但勢不能全錄故姑舉一二端以概其餘耳如數章俱有風體豈能盡錄數章爲歟幽詩之注乎又彼都人士狐裘黃黃孔疏謂此詩之狐裘爲息民服服則黃衣君不從孔疏之說謂古人服制衣與冠同色若是黃衣則與次章緇撮不同色經明指緇衣之冠則狐裘必非黃者疏以黃黃二字遂定爲黃狐望文生義誤矣黃黃猶皇皇耳考爾雅釋詁皇皇穆穆美也郭注云穆穆已上皆美盛之貌黃皇古通用則黃黃亦言其裘美盛之貌耳鄭箋但謂黃黃然卽此義也此詩之狐裘蓋狐青裘也王藻君子狐青裘元緇衣以楊之鄭注云君子大夫士也據此是青裘用元衣相稱而元與緇同色則因經陳緇撮一冠而知此裘必用狐青裘矣君所說經他多類此君娶同

邑高氏妻兄名學耀字星儀妻弟名學瀛字子登並通經學競爽一門亦近世所罕覩也番禺又有趙君齊嬰字子韶和易狷介博通經史深于天文輿地康熙輿地圖十八行省每府爲一圖乾隆輿地圖東至朝鮮南至中印度西至都爾佳地中海北至俄羅斯海冰海幅幘廣遠亘古未有皆嘗手摹之又嘗撰漢書西域傳考證一卷於漢地今地考證極精云

仁和吳司馬廷華於經疏無不窺少讀周禮九賦口率出泉注疑而質諸師師曰此鄭氏以漢法補周禮之誤於是知注疏未盡合經益肆力精研疑則發之不下千數百條年及艾去官歸里乃編爲三禮疑義百數十卷會朝廷纂修三禮義疏司馬以總裁薦奉詔入館益得徧搜秘府諸

籍及四方遺老禮說總裁俱爲推服悉以考訂屬焉繼復  
悉以三禮禮節四圖因檢諸儒禮圖七十餘種增訂補輯  
多正敖氏之訛凡十年書成而所著三禮疑義由是數易  
其稿又念儀禮一書幾成絕學叙次質直無脈絡起止可  
尋又自一字至十數字句多奇零不整語語澁口且監本  
與石經各有脫誤鄭注與賈疏不免輻輳嘗語人曰讀儀  
禮之失有二句讀不明則句可移掇上下往往賓主易位  
東西乖方其失者一章次不分則禮之始終度數與賓尸  
介紹冠服玉帛牲牢尊俎之陳如滿屋散錢毫無條貫其  
失者二用是刪繁取約補脫勘訛一篇之中畫其節目一  
節之內析其句讀爲儀禮章句十七卷是編乾隆丁丑司  
馬之子壽祺刻於粵東道光初又刻入皇清經解風行宇

內家置一編固學禮者所不可無矣惟三禮疑義原稿舊存武林翁氏有百梅草堂今存汪小米孝廉遠孫家汪氏藏書甲於武林卽振綺堂者是也孝廉勤於著述嘗作陸氏經典釋文補體例謹嚴又爲國語義疏續溪胡竹邨戶部嘗稱之亦必可觀也

夏訓導名鑾字德音朗齋其號也安徽當塗縣人少穎悟嘉慶丙辰舉孝廉方正加六品銜戊午以優行貢成均已未考取八旗官學教習期滿用知縣改選徽州府訓導訓導之學於詩古文詞訓詁名物無不研究而尤以切於身有益於世者爲急務初習漢注唐疏多能闇誦後服膺朱子身體力行教子弟必以小學爲宗性通達爽愷愛才好客竟日懽呼談論絕少倦容見人有一節之長稱譽不置

其所不及推誠嚮導不憚再三人有急就之謀必爲籌畫盡善遇事有不可義形於色然忠告善道於人無忤平居自奉儉約曰物力當惜也至於周人困乏則一無吝嗇意雅不欲與人競長短謂讓字終身受用無盡嘗論近儒學術兼經史詞章者惟朱竹垞兼漢學宋學者惟江慎修江氏書無不讀人知其達於三禮而不知其近思錄集注實擷宋學之精又謂戴東原學出江氏其著書文詞古質可謂青出於藍然不如江氏書平易切實人人可曉足裨後學是以蒞任之初卽選次江氏著述行事詳之上官請祀鄉賢祠徼之近儒如程教授瑤田汪孝廉龍陵教授廷堪皆樂與訓導交常相過從凌教授沒而無子訓導爲經紀其喪且哭之哀汪明經萊貧而績學廩品因庠序者二十



餘年訓導至亟舉優行爲學使所賞膺首選後汪明經沒遺孤貧甚訓導以時欵給並招入署齋教之其他季考所舉優行亦多名宿訓導之在徽也於士之有學行者則敬禮之薦揚之唯恐其不達其有負美質而學未至者必爲策勵之教益之使底於成至或其人偶有過失或因於貧窮亦必曲加矜恤不惜解橐以助以故在郡前後十餘年士無賢否莫不愛重訓導云道光九年年七十致仕卒於家

邵秀才名佳銳字治南餘姚縣學增廣生二雲學士之父也幼時羣經三史皆能暗誦中年以後獨喜讀易博覽眾說期於自得嘗病後儒言易多求諸十翼之外愈巧而愈離其宗故爲說曰易有十翼猶禮春秋之有傳也傳以釋

經義文之意待孔子而明經傳之篇不可亂而經傳之義未嘗異費直以彖象繫詞文言解說上下經此善於讀易者也後儒謂伏羲文王周公孔子各自爲易不可以孔子之說爲文王之說此不善於讀易者也元亨利貞四德其義盡於文言爲上下經綱領貞屬信不屬智文言訓貞爲固固者執守之義時位不同故有不可貞之詞訓正而固於義有所窒矣又謂序卦雜卦非聖人不能作序卦主流行生生之謂易也雜卦主對待一陰一陽之謂道也又謂言卦變不如言互體鄭康成虞翻諸人取連互陰陽消長法象天然一傳而爲卦變屢變不已遂無定義按卦圖依爻遞變似本八宮宗廟游歸之法然圖與歌取例不一自著而自亂之不如漢人言兩互之不失其常也秀才行年

有明生書  
六十無所遇不以屑意惟覃思經學卓然有所得而名不出鄉曲迨學士以鄉舉出錢辛楣詹事之門詹事聞秀才經說稱其好學深思可以言道而學始彰世多知學士經學湛深而不知其學固有自來也

績溪胡竹邨戶部名培翬樸齋明經

名匡衷著有儀禮釋官左傳翼服等書

之文孫淩次仲教授弟子也嘉慶庚午科舉人乙卯恩科進士改戶部戶部少承義方博通諸經而尤邃於三禮嘗因詩西南其戶鄭箋而知東房西室乃燕寢之制成考二卷已刻入皇清經解復與桐城張阮林臨海洪筠軒涇縣胡墨莊朱蘭坡包孟開諸君反覆詳剖以求至當凡釋註論論徽轍考屏牖解廡縣浮沈闕闕楸柵皆禮記之支流餘裔也

戶部說經之文刻入皇清經解者曰研六室近儒雜著道光丁酉自行編刻者曰研六室文鈔

顧震滄著左氏引經不及周官儀禮論疑儀禮爲後人綴輯非周公書顧氏所據以論孟所未徵引詩書三傳所未經見戶部特爲之辨曰夫儀禮之書叙次繁重有必詳其原委而義始見者非若他經之可以斷章取義也故各書引其詞者頗少然其儀文節次爲諸經所稱引者多矣儀禮昏禮有納采問名納吉納徵請期親迎六者而穀梁傳云有納采有問名有納徵有告期此所謂禮非卽儀禮乎聘禮君至近郊君使卿勞及聘畢賓行君使卿贈是王國接賓之事以郊勞始以贈賄終而左傳云齊國莊子來聘自郊勞至于贈賄禮成而加之以敏又曰入有郊勞出有贈賄此非本禮經爲言乎又聘禮有遣所聘國君喪及夫人世子喪之禮又有出聘後遣本國君喪及聘賓私喪之

禮又有賓死以棺造朝將命之禮而左傳云季文子將聘于晉使求遭喪之禮以行又陳芋尹蓋曰事死如生禮也於是乎有朝聘而終以尸將事之禮又有朝聘而遭喪之禮設非先王有禮經季文子何從求之而芋尹蓋之言又何所據乎覲禮天子使人賜侯氏以車服侯氏降兩階之間北面再拜稽首升成拜受而左傳王使宰孔賜齊侯胙自注下拜即覲禮所謂降階拜齊侯下拜登受也登受即所謂升成拜受也雖以宰孔之詞而不敢不下拜者非即守此禮乎論語賓不顧本儀禮聘禮君祭先飯本儀禮士相見禮射不主皮入門鞠躬私覲愉愉並見儀禮鄉射記聘禮記而夫子曰揖讓而升下而飲非約鄉射大射之文而言乎曰拜下禮也非約燕覲聘食諸篇之文而言乎曰關雎之亂非即謂鄉飲燕射

之合樂周南關雎葛覃卷耳召南鵲巢采芣采蘋乎孟子  
載齊宣王問禮爲舊君有服非卽本喪服經爲問乎漢藝  
文志載禮古經五十六篇今存者惟十七篇多大夫士禮  
其天子諸侯禮存者無幾而詩書紀王朝政績宜其徵引  
者少也然而書顧命之官室與禮經一一符合王伯厚以  
詩之賓之初筵行葦可以見大射儀楚茨可以見少年饋  
食禮而弗替引之一語楚茨與少牢同如此尙得謂爲孔  
孟所未嘗道詩書三傳所未經見哉朱蘭坡侍講謂戶部  
說經之文援引賅博而條達明盡不信然乎戶部遂於儀  
禮因賈疏漏略重爲義疏旁搜遠紹左右逢原精力專注  
於此云

海甯陳徵君名鍾字仲魚又字簡莊以舉人徵舉嘉慶元

年孝廉方正酷嗜書籍購置不遺餘力精敏果銳強於記誦經史百家靡不綜覽而尤專意於經學又克廣攬窮蒐余嘗見其所撰經籍跋文一卷鉤深索隱凡古本之爲後之妄人竄亂芟併者莫不審考其原來次第而文字之更改淆混者一一校正今人復得見本來面目可謂盡善矣又嘗輯馬融鄭君諸家論語逸注爲論語古訓十卷其自敘云論語古訓存漢經師之遺義也論語有古論有齊論有魯論古論不傳張禹兼講齊魯號張侯論包氏周氏章句出焉馬融亦爲之訓說鄭君據魯論參考齊古而爲之注何晏等集孔包周馬鄭以及陳王等家之說并下己意爲集解梁陳之時鄭何並立於國學周齊鄭學獨立至隋而何鄭並行鄭氏特盛至宋而亡今以集解爲本考諸載

籍所引遺說爲古訓十卷言古者以別於今也不曰集解  
補者守缺抱殘不得言補也凡經文從邢疏本而以漢唐  
石經皇疏高麗本經典釋文及七經孟子考文校注於下  
或見於他書者亦間爲援證也至邢本集解舛罕良多甚  
將語助字刪削致文義不屬今則從皇本高麗本也古論  
孔注據何晏叙世既不傳集解所采說多不類且與說文  
解字所稱論語古文不合反不如包氏章句之古疑爲後  
人假託特與尙書傳又異今姑從集解存之也集解采七  
家之說有兩周氏一漢人不悉其名一魏人複姓周生名  
烈今皇本高麗本並作周烈曰則無漢之周氏邢本並作  
周曰則無魏之周生積疑於中無從是正也鄭康成漢世  
大儒故集解之外蒐輯鄭說獨多且以愚意疏通證明之



所以補疏家之未備也馬融鄭之師也王肅難鄭者也存  
馬王之說亦可以發明鄭注也少習此經長無成就謹以  
肄業所及博采通人之辭勉具簡編就正有道凡引諸說  
或稱官從鄭注周禮書鄭司農鄭大夫例也或稱字從鄭  
注書杜子春例也乾隆五十有九年冬十有二月甲寅朔  
海甯陳鱣書於震澤旅次

朱清熙刻本禮記注二十卷吳門顧安道明經所得前有  
二小印曰乾學曰徐健菴知爲崑山徐氏傳是樓舊藏明  
經將刊行未及而沒陽城張古餘官蘇州知府借讀而愛  
之亟覓好手影鈔重雕覆校者卽明經之弟千里茂才刻  
成考其異同爲考異二卷極爲精審祭義天子設四學注  
四學謂周四郊之虞庠也顧千里云四郊之四當作西正

義云天子設四學以有虞庠爲小學設置于西郊是天子設四學據周言之正義本此注是西字非四字後來本誤改作四并正義中設置于西郊亦改之非是又云其所以致誤者因正義釋此注曰皇氏云四郊虞庠以爲四郊皆有虞庠故遂改之耳不知此正義但廣異說卽文王世子凡語於郊者正義所謂或徧在四郊者耳皆不取爲義彼說從西郊不從四郊此可互見皇侃之義以北史劉芳傳證之實出於王肅或肅義作四郊正義序已言皇氏時乖鄭義無足怪者乃或又據芳傳所引并欲改王制虞庠在國之西郊亦作四郊致爲巨謬云云按所謂或據芳傳者蓋指孫頤谷侍御讀書脞錄有云王制虞庠在國之西郊據北史劉芳傳引作四郊蓋西字誤也是書初出段茂堂

大令作禮記四郊疏證申孫黜顧其略云王制四郊孔本作西而祭義四學注謂周四郊之虞庠也系用王制語彼以四釋四則此必是四字確然無疑必特著周之虞庠在四郊者以其不在國中王宮之東亦不專在西郊與前三代迥異故特書之云云凡數千言顧復作學制備忘記以辨之亦數千言彼此遂成水火海甯陳仲魚徵君欲爲調人竟莫能解因彙其書爲一冊題曰段顧校讐編洪稚存編修見之曰正可對朱陸異同辨相與一笑云

經學博采錄卷九

南海桂文燦

方按察名體字茶山江南績溪人也由刑部郎中出爲江西九江知府厯官江蘇糧道江南鹽道擢湖北按察使涖官多惠政民咸便之釐奸剔弊尤爲楚民所德嘗立楚無冤民扁於黃鶴樓在任年餘卽歸年七十九卒按察藏書最富博通經史嘗謂初學讀經宜先授以詩經讀畢卽授以尙書左傳自唐虞以至周末二千年政事人物俾熟於胸然後授以他經又曰讀史宜將二十二史中紀傳表志分裝成冊以類相從便於檢閱又曰韓文公苦儀禮難讀以爲無用後又耳食附和不知刑部辨案卽離不得喪服經傳故官刑部練習刑名根據禮經以辨訂例案之文甚

多云遺集若干卷其關乎經義最大者有儀禮今古文考  
正及儀禮古文考誤二篇其今古文考正曰儀禮注稱今  
文古文文字異者凡數十百處按高堂生傳禮十七篇蕭奮  
孟卿后蒼戴德戴聖所謂五傳弟子也其所傳習者爲今  
文若古文則經之出於魯淹中者河間獻王獻之劉向錄  
之劉歆請之而終不得立於學官是以古文五十六篇鮮  
有傳習之者卽今所存十七篇亦以同於高堂生故行於  
世蓋自鄭康成以前今古文各自爲書而習古文者每不  
若今文之盛及至康成參以今古文定爲之注儀禮古文  
由是間傳於世而今古文亦由是淆亂矣自後傳鄭學者  
若王肅孔倫陳詮李軌袁準裴松之雷次宗蔡超田儻之  
劉道拔劉昌宗周續之沈重張冲黃慶李孟哲之屬參互

傳寫隨意增改文字往往歧異陸德明經典釋文所謂亦作又作或作者正指是也賈公彥據黃李二家作疏已非鄭氏原定之書公彥論鄉飲酒執觶興洗北面句云俗本有盥字則宋元傳本又公彥所謂俗本也陸德明因劉李二家之音作釋文而劉氏本如以時爲昔以糟爲菹以洗爲淬以韁爲繮以御爲衙與陸氏異是陸氏釋文又非劉氏之舊況鄭氏乎至今時刊本注疏較宋元以來舊本并鄭注所存今古文往往殘缺脫落彼此錯見是則鄭氏所定今古文之書屢經淆亂而況河間獻王高堂生之所傳者乎今據鄭注所存者考其譌脫爲標舉之以俟考正今古文者之採擇又古文考誤曰賈公彥儀禮疏云高堂生傳十七篇是今文也孔子宅得亡儀禮五十六篇其文皆

篆書是爲古文按漢書景十三王傳魯恭王壞孔子宅於其壁中得古文經傳藝文志古文尙書及禮記論語孝經凡數十篇皆古字無儀禮五十六篇之說志云禮記蓋亦諸儒記禮之說如別錄古文記二百四篇藝文志記一百三十篇之類與古文禮又自有別且孔壁古文字讀皆異雖好古如孔安國必以今文考之始通其學如無今文可考之尙書十六篇逸禮三十九篇卽逸在秘府莫有知者所以昭帝女讀古文論語二十一篇宣帝下太常博士時稱難曉若皆篆書則漢時人人能讀何云難曉乎此賈疏之誤也余考班固藝文志云禮古經者出於魯淹中及孔氏學十七篇文相似多三十九篇景十三王傳云河間獻王修學好古所得皆古文先秦舊書周官尙書禮禮記孟

子老子之屬傳所謂禮卽志云禮古經五十六卷傳所謂禮記卽志云記一百三十一篇及明堂陰陽之屬又鄭康成六藝論云河間獻王古文禮五十六篇其十七篇與高堂生所傳同而字多異隋書經籍志云漢初高堂生傳十七篇又有古經出於淹中河間獻王好古愛學收集餘燼得而獻之合五十六篇及明堂陰陽之記無敢傳之者惟古經十七篇與高堂生所傳不殊而字多異自高堂生至宣帝時后蒼最明其業授戴德戴聖慶普漢末鄭玄傳小戴之學後以古經校之取其義長者作注爲鄭氏學是知禮古經出魯淹中河間獻王得而獻之鄭康成取以校之見於漢藝文志隋經籍志及鄭康成六藝論語甚明白賈公彥願以淹中所得之禮古經爲孔壁禮記不亦誤乎後



魏孫惠蔚云淹中之經孔安國所得吳草廬何喬新云魯共王得於孔壁河間獻王獻之其謬益甚故爲審諦源流以俟好古之君子云

海州許月南孝廉桂林以善對策爲主司湯敦甫相國所賞中道光十二年舉人博學好古尤深天文算法及穀梁春秋之學所著宣西通二卷阮文達公已采入續疇人傳穀梁春秋爲二千年以來絕學近之治經者無慮數十家左氏公羊著錄不少而穀梁獨無專肄業之者柳賓叔與恩著穀梁大義述一書文達嘗舉鄭君善經近孔語以序之孝廉所著穀梁釋例一書有引公羊互證者有駁公羊而專主者其自撰總論末據鄭君穀梁善於經之語以爲時月日卽善經之一文達序之謂是亦篤信鄭學不爲無

根之譚與柳氏書可相輔而行誠篤論也書凡四卷第一  
卷爲總論第二卷爲提綱第三卷爲述傳第四卷爲傳外  
餘例總論一卷先述穀梁之有功於經者三端次辨趙匡  
劉敞程頤學汪克寬顧棟高諸說之誤終論左氏公羊之  
異同蓋卽以此篇爲自序也提綱一卷舉其大端述傳一  
卷析其子目所分之門類大率相同正月例第一夏四月  
秋七月冬十月例第二閏月例第三朔晦例第四卽位例  
第五公如例第六朝例第七盟例第八郊例第九烝嘗例  
第十嘉禮例第十一大閏例第十二侵例第十三戰例第  
十四敗例第十五潰例第十六入例第十七此滅入取例  
第十八滅例第十九入例第二十此出入歸例第二十一  
奔例第二十二卒葬例第二十三弑例第二十四殺例第二

十五日食例第二十六旱雩例第二十七灾異例第二十八傳疑例第二十九至書時月日正例及不用正例列於提綱之始書昔例及夜中日中日下稷例列於提綱之末而述傳內不列之者以其爲全書之通例不專屬於一門故有綱而無目也傳外餘例一卷則以傳無明文而僅見於范注者附之於後夫人如例第一外相朝例第二聘例第三會例第四平例第五遇例第六夫人饗例第七王使例第八歸例第九此歸地之例與提綱述傳人歸之例不同宗廟例第十祭祀例第十一逆女例第十二送女例第十三狩例第十四城例第十五伐例第十六圍例第十七克例第十八救例第十九遷例第二十諸侯奔例第二十一諸侯歸例第二十二執例第二十三立例第二十四公薨例第二十五夫人薨例第

二十六周大夫卒例第二十七內女卒例第二十八贈例  
第二十九有年例第三十大水例第三十一內灾例第三  
十二外灾例第三十三凡注稱傳例爲傳所本有者概不  
重錄此書初寫定而孝廉沒其兄石華國博刊之阮文達  
序謂當刻入學海堂經解續編是則有待於粵人之好學  
者矣孝廉又謂左氏左袒晉三家齊田氏必六國時遜詞  
避禍昔人疑爲六國時人良是蓋其人負絕世文才就公  
穀二傳左右采獲成一家書因撮左氏之異同撰疑左二  
卷以短左氏昔漢何邵公旣著公羊解詁及墨守又撰左  
氏膏肓穀梁廢疾以短之爲專家之學固如此也

汪容甫拔萃中揚州江都人父一元縣學增生少孤貧母  
鄒口授以小學四子書稍長學於書肆過目成誦博綜典

籍遂爲通人年二十補府學附生乾隆二十二年選拔貢  
謝金圖學使墉以拔萃名別置一榜嘗語人曰予之先容  
甫以爵也若以學則余當北面事之已其推重如此涇縣  
包大令世臣曰世人皆稱容甫使酒不守繩尺乃容甫終  
其身酒未沾唇世人又言容甫前妻孫氏死於非命然孫  
氏被出後嘉慶乙丑余至揚州時猶及見之人言之謬戾  
如此蓋容甫性好譏彈而人心不古故多譏謗之語歟所  
著有尙書考異儀禮經注正譌大戴禮記補注春秋述義  
春秋後傳國語正譌爾雅補注小學說文求端經義知新  
記述學內外篇舊學蓄疑彌識錄秦蠶食六國表金陵地  
圖考廣陵通典共若干卷藏於家容甫之子曰喜孫字孟  
慈由舉人授內閣中書遷戶部出守河南懷慶府能世其

學與人交不拘往還人多以狂士目之守懷慶有惠政河南八府惟懷慶糧最重民困久矣時值雨旱孟慈既不召僧道又不用古法始而步行祈禱繼而日則長跪壇前夜則露宿壇下十餘晝夜天果大雨後竟以是得疾卒於官至今婦孺亦稱道之咸豐壬子余問之楊湘雲戶部戶部名寶臣言貌篤實深於算學著有算書若干卷嘗謂觀人交友當得一眞字一涉於僞餘無足觀云

易之取象至廣天地萬物無不賅備而其義不越平時與位得時當位則吉失時出位則凶易傳已詳言之蓋欲人觀象玩詞審時位而知吉凶進退也漢之儒者各以其師授釋經或言卦氣或言爻辰或言納甲或言乾升坤降或言世應飛伏雖其說無不可通然往往舉偏而遺全蔽象

而忘理魏晉以後輔嗣注出一掃諸儒之說而易又涉於  
虛無宜與汪君企山著周易釋傳若干卷自言繹夫子釋  
經之傳而經明根據十翼發揮卦象如是乃爲孔門之易  
非術士之易已書中如解乾之九三不從注疏讀若厲爲  
句以厲卽訓危文言云雖危無咎知九三所居之位實危  
不得云若也解蒙之初六不從舊說刑人爲刑罰以象傳  
云正法知用正人爲法刑卽儀刑之謂也又解用說桎梏  
爲去物欲之錮蔽與孟子桎梏亡義合至需之上六特明當  
位不當位之例尤爲貫徹全經也

漢興詩有齊魯韓毛四家齊魯韓三家先立學官毛最後  
立鄭君據毛詩作箋申毛於是三家遂微自後漢至北宋  
初言詩者率宗毛詩小序無異議也南宋鄭漁仲始著書

駁序朱子多采用之後之攻序者遂不遺餘力而近儒又多發明毛鄭義以申序說是經門戶之爭蓋數百年矣然而三百篇中自天文地理朝廟典章下至鳥獸草木一名一物之微罔不具載讀詩者必先由訓詁以通乎制度名物而後作詩之旨明若訓詁不詳名物不知而徒爭辨序說之得失不亦僨乎婺源黃君著黃氏詩考五卷其書不空演文句唯取各篇字義逐一訓釋於名物制度徵引考證尤詳至作詩之意則闕而不言以俟涵泳經文者得之誠有裨詩學之書也末復爲附考數篇並及齊魯韓毛朱子各家說而無所偏主蓋慎之也黃君名啟興字石香兼通篆隸句股亦工詩有礫鳴觀雲等集所著各書手稿並存同邑程君家程君名沆字竹溪道光戊子入都應京兆



試裊載經學書千數百卷寓邸舍丹黃校讀不屑屑爲舉子業亦好古士也

吳中爲儀禮學者有冠雲沈氏鶴侶褚氏震蒼江氏沈氏之儀禮小疏所箋釋僅止士冠士昏公食喪服士喪旣夕數篇而考訂多精覈褚氏之儀禮管見專爲糾正敖氏集說而作皆已刊行惟江氏之讀儀禮私記未經梓行人少知者江氏同邑陳君碩甫藏其槧本其書多取敖君善郝仲與萬充宗諸家說之異於注疏者訂其是非而亦時下己意又多載金氏輔之之說而金氏禮箋亦載其解士虞禮啟牖鄉如初之鄉當爲饗一條殆與金氏相從習禮者歟末以降正義之服黃氏勉齋有例楊氏信齋有圖不無互異別爲降正義服考定一卷又以通志堂所刻儀禮圖

失於校讐中多譌誤取元刻本訂正之爲儀禮圖訂誤一卷俱附書後自序謂始乾隆己巳至丙戌蓋亦積十數年精力爲之儀禮之書人每以其難讀故治之者少幸有研求其義者又或憔悴枯槁以死而其書不能梓行將必泯滅不傳於世不亦悲夫江氏名筠字震蒼江蘇長洲人乾隆壬午以第二人舉於鄉良庭徵君之兄也

續溪胡茂才名匡憲字懋中號繩軒縣學廩生樸齋明經之同堂弟也父名清聚字思平精研諸經及宋五子書粹然儒者茂才自少祇承庭訓舉止端重迥異常兒年十六補縣學生二十而孤奮然自勵不隨流俗從鄭炳也贊善讀書紫陽山數年學益進盡通諸經常欲重刊朱子周易本義以復漢志十二篇之舊又謂詩毛傳最古鄭氏已不

盡悉其義今本毛傳多被王肅竄亂異同之跡尚可考見  
又嘗謂唐宋以來不明古人字借聲轉之理解經每多隔  
閼又以四子書體驗於倫常日用識解有足補前人者欲  
條記爲一編而未成所著有毛詩集釋二十卷繩軒讀經  
記十二卷讀史隨筆六卷石經詳考四卷繩軒集三卷易  
書詩禮春秋及許氏說文皆有手鈔定本存於家生平嚴  
氣正性言動必以禮法所交遊多名宿如方茶山按察體  
其一也里中後進有爲非者必曰無令繩軒先生知之道  
旁有跛倚箕倨者見茂才必改容茂才爲廩保時有汪某  
應童試其仇家廩生也欲抑其考徧飲諸廩保告之曰某  
服未闋願諸君勿保也茂才詰之曰其人以何年月丁艱  
居喪幾月矣飲者乃吐實曰汪某前月服闋已惟與某有

隙故欲抑之茂才曰是何言歟卽爲保之其人遂以是年  
遊庠其不肯徇私類如此茂才授徒數十年學者從之至  
老不倦其爲教也嚴肅懇切尤善講說故誠明者悅愚頑  
者悟桀傲者格來學者必令讀經親爲之背從遊賴以成  
立者百餘人聞其教者無不欣服其沒也門人相與尸祝  
之蓋數十年來無此師範矣卒於嘉慶七年年六十子秉  
虔字伯敬號春喬乾隆六十年舉人嘉慶四年進士用主  
事分刑部官至甘肅丹噶爾同知少聞庭訓貫通諸經後  
依方茶山按察人都肄業成均久居京師學問日進會試  
出大興朱文正儀徵阮文達兩太傅之門而歸安姚文僊  
高郵王文簡兩尙書武進張皋聞編修棲霞郝蘭皋戶部  
皆其同年友多得師友之助尤精於訓詁音韻所著有周

易小識八卷尙書小識六卷論語小識八卷皆取諸經文字句讀異同詳引而辨之卦本圖考一卷論畫卦之原尙書序錄一卷毛詩序錄四卷列序說於前附注疏於下而以己意論斷之古韻論三卷辨論諸家古韻折衷至當漢西京博士考二卷詳考諸經博士源流而西漢傳經之師法詳焉甘州明季成仁錄四卷詳考李賊陷甘死守殉節諸忠烈並記捐廉祠祀事官張掖作也景忠錄三卷詳考河州自宋至國朝殉節死事諸人姓名事略官河州作也此皆司馬所手定者其未定者尙有經義聞斯錄雜考諸經分條記之曰聞斯者著其本於庭訓也又有槐南麗澤編在成均時作也又有古韻編說文小識共爲小學卮言月令小識四書釋名羣經條考子史雜論對牀夜話惜分

齋叢錄消夏錄文集詩集共數十卷司馬於毛詩說文用力最深而毛詩小識未成說文亦未有專書論者惜之司馬沒於甘肅任所諸書不獲流布故道光初吾粵學海堂編刻皇清經解略焉爲本並藏於家其孫肇昕珍藏之道光末平定張石洲明經編校連筠簪叢書曾刊周易小識八卷

金誠齋名鶚浙江臨海人嘉慶丙子優貢生山陽汪文端尙書所拔士也博覽羣書尤精三禮所著求古錄十餘冊取禮經宮室衣服郊禘祭祀井田之類並羣經中有涉輿地名物者詳考而明辨之每條各爲一篇貫串漢唐以來及近儒之說誠齋以優貢朝考入都文端留寓邸第著論語說甫竟而疾作病劇時文端家人欲徙之他所文端曰

生於我乎館死於我乎殯何徙爲且病劇而徙之是速其死也竟以己卯歲元旦歿於文端邸第文端爲殯殮而資送其柩於家所著書爲一篋局而歸之誠齋沒後三十年而長洲陳碩甫明經始刻求古錄於江南文燥嘗得其書讀之書中如論天子廟制謂當從禮記穀梁荀子爲七廟而辨惠定宇力主四廟之說爲非論諸侯寢制謂路寢一小寢三當爲四寢而辨舊說路寢一小寢二之非又謂伯夷叔齊餓於首陽之下首陽山卽唐風所云首陽之顛是也山名首陽不得以蒲阪之雷首山當之鄉黨享禮有容色係一事觀聘禮云若有言則以束帛如享禮可證不得謂禮爲禮賓分享與禮爲二皆致確之論也汪文端云誠齋之書雖不免有迂曲處然其精者確不可及胡墨莊觀

察云誠齋衣敝面垢竟日窮經若不知有他事者其用心專一如此今其遺書之存於家者未知若何而其好古勤學未竟其志以死實有不容泯滅者已

胡觀察名承珙字景孟號墨莊江南涇縣人也少穎悟誦讀倍常見十三入庠十八食餽嘉慶六年辛酉由選拔貢生中舉人乙丑成進士選庶吉士尋授編修厯官科道數上章言事皆關民生利病吏治得失出巡福建延建邵道調臺灣道還引疾歸里觀察少工詞章通籍後究心經術遇有講求實學者必殷勤造訪引爲同志而懃懇和厚待友以誠癸酉居京師與郝蘭皋胡竹邨兩戶部張阮林孝廉即舍並相近四人者蓋無旬日不會晤晤則必談經義嘗於酒酣乘興步月窺臺四人相與高談縱辯於月色空



明莽墟無人之地亦可謂意氣之盛矣人有投以撰著者必細加考覈別其是非不爲虛文酬應解經多心得不苟同前人以牽於公事未就迫得假歸里遂專力著作精研小學熟於爾雅說文以惠氏九經古義未及爾雅遂補撰數十條小爾雅原本不傳今存孔叢子中世多以爲僞書觀察初亦疑其僞後乃斷以爲真乃撰小爾雅義證又取戴東原所疑四事一一辨釋具載本書胡竹邨戶部重疏儀禮觀察以鄭注引古今文異字賈疏多略而不及乃謂戶部曰吾當專爲一書以助子全疏之一矣其後在閩渡臺以書笥累重難攜獨攜儀禮一經每日公事畢輒纂一二條成儀禮古今文義疏又嘗撰春秋三傳文字異同考證然其畢生精力則在毛詩所撰毛詩後箋一書采集甚

富近是者錄之似是而非者辨之而其最善之處在能於毛傳本文前後會出指歸又能於西漢以前古書中反覆尋考貫通詩義證明毛旨此則君所獨得者同時長洲陳碩甫亦治毛詩君數與書講論得失陳氏著書惟毛之從觀察略有別擇然亦從毛者多撰藁屢易手自寫定至魯頌泮水而疾作未卒業陳氏補之所著儀禮古今文義疏十七卷小爾雅義疏十三卷皆手自付梓毛詩後箋三十卷爾雅古義二卷求是堂詩集二十二卷奏摺一卷文集六卷駢體文二卷卒後子先翰先頌次第梓行其未成者尚有公羊古義禮記別義二書觀察操行誼篤歸田後家居九載足不出里門不預外事惟與二三故舊間爲詩酒之會注經常至夜分寒暑罔輟道光十二年閏九月十四

日卒卒年五十有七聞其易簀前一日天色晴霽夜半微雨無聲家人環侍不知也觀察忽曰有雨乎家人曰無也觀察曰有啟戶視之則階濕矣嗟乎此其來有自故存歿之際早自了徹耶又豈其將歿精英結而爲神故室外事無不知耶

績溪胡君紹勳竹邨戶部之族弟也愛尙儒術潛心篤學從戶部讀書紫陽山房戶部令讀經先讀注疏宋儒之說次讀近儒各家之說並示以爾雅說文諸書爲識字根源尤宜急讀其時同學者胡君之弟紹煥胡君定陽章君遇鴻葛君英亦皆分習經注一編每於食頃各以疑義相質問流連歲月教學固相長也迨戶部官京師胡君獨居乃發憤著書旣爲周易異文疏證春秋異文疏證又以朱子

論孟集注學庸章句有本舊解者有易舊解者有補舊解所不及者後人每是古非今動執舊解相詰難固屬泥古之過然讀集注章句而不參稽舊說則朱子棄取之意無由見因每日讀書遇有與四書相發明者卽與四書古注同錄出以資研究日積月累成四書拾義若干卷書中言詞審慎絕無攻擊駁難之習雖采錄舊說而不盡從如論語思而不學則殆據公羊何注訓殆爲疑不從舊注疲殆之說孟子所存者神據爾雅訓存爲在神爲治言所在之地無不治不從舊說其化如神之說又如論語與之粟九百朱子不用舊注九百斗之文然第云不可考三年學不至於穀朱子本孫氏綽之說以穀爲祿不從舊注穀善之訓然三年未有疏解君則詳考厯代量器大小之殊定九

百爲九百斛據周禮興賢能爲鄉遂官吏之制以三年爲  
三年大比實足以證明集注又論語比及三年之比孟子  
必慢其經界之慢舊注及集注俱無明詁君則據廣雅訓  
比爲近而後比及二字有別據方言廣雅訓慢爲敗而後  
慢字可解長洲陳碩甫明經稱此書考訂精覈可以接武  
閻氏四書釋地竹邨戶部謂此書雖篇帙無多而能博求  
之周秦古書與漢魏以來舊詁且於音訓假借亦自了然  
於胸使舊注癥結盡解有功經學誠非淺鮮云

昔紀文達公欲著左傳規杜持平一書自云年老無及旣  
屬曲阜桂君馥爲之其言云劉炫規杜一部書豈無是處  
孔疏意主申杜凡劉說盡駁之此冤獄也平心持衡各還  
其是則杜之失無損於杜而孔之駁不足爲劉病矣如杜

以晉先穀爲彘季劉規之案成十八年傳彘季是隨會之  
子士魴非先穀劉說是也桂君書未成語見札樸公又屬  
餘姚邵君瑛爲之成書六卷

文獻

嘗得而讀之有從杜者

有從劉者援引賅博持論名通讀左者可以息喙矣其自  
序云左傳自杜氏集劉子駿賈景伯許惠卿穎子嚴之注  
題曰經傳集解發明甚多古今稱之然棄經從傳先儒羣  
集矢焉故自杜而後南朝崔靈恩著左氏條議以難杜北  
朝則張冲著春秋義略異於杜氏者七十餘事衛冀隆精  
服氏學難杜六十三事至劉光伯隋世大儒隋志記其撰  
左傳述義四十卷孔冲遠作正義據以爲本見於自序今  
亦無從別識獨其規過唐志作三卷者孔氏一一標出而  
概以爲非毋亦祖杜之過余幼承庭訓授讀是經蓄疑者

久矣壬戌之秋將乞假還里謁河間紀文達公於邸第公  
意若重有所託者瑛敬進而請之慨然曰當日編纂四庫  
嘗欲作規杜持平一書以釋兩家之紛今老矣有志未逮  
惟汝同志其爲我成之瑛謹誌之不敢忘其時方殫力於  
說文爲羣經正字之學猝猝未暇旁及迨脫稿而余年已  
七十有四矣精力日益衰幾何不負師命也幸天假餘年  
猶可力疾從事經始於甲戌之冬閱十有五月而書成顧  
以秉燭之明又苦索居之久其去於負師者又幾何也噫  
是非誰折提命如新安得起九京而執經問難也夫嘉慶  
乙亥嘉平邵瑛書於桂隱書屋

休甯戴東原吉士震少從婺源江慎修明經遊通天地人  
之學乾隆二十七年舉於鄉後以修書通籍未及散館而

卒有同年友二人曰高郵任領從基振曰順德胡同謙亦  
常任君官國子監監丞深於小學所著爾雅注疏箋補吉  
士嘗序之書中考究精詳辨據明晰吉士稱其勤於治經  
蓋深病夫後儒鑿空之說歧惑學者欲使本諸爾雅以正  
訓詁故以是學先焉讀其書者自知矣任君又有訂正玉  
海糾謬補遺實有補於浚儀王氏胡君癸未下第南歸與  
吉士同舟至富春江乃別舟中盡鈔吉士所著書攜歸將  
刊之又識錢辛楣詹事於京師詹事稱爲嶺南才士與之  
言詩文源流洞中藏結抵粵後嘗致書於詹事言將壹志  
於經詹事深異之居無何卒年止三十有一云

吳子序編修嘉賓江西南豐人道光戊戌進士也服古通  
經尤究心士禮喪服所著喪服會通說四卷讀四書說六



卷咸豐初刻於揚州會通云者於親疏貴賤長幼男女之別卽其服制各爲圖說會而通之卷一解儀禮喪服疏釋古義詞旨簡明卷二喪服圖說上凡圖說八說一士宗圖說一五屬服圖說二名服圖說三出者服圖說四外親服圖說五婦人從夫服圖說六婦人服其宗親圖說七婦人相爲服圖說八喪有無後無無主說九卷三喪服圖說下凡圖說一說五表說二大夫宗圖說十君與公族服說十一大夫大夫之子服說十二爲人後者服說十三臣服君及從服說十四妾服君之黨及私服說十五喪服表說十六喪位表說十七卷四喪服改制說改制云者考漢唐及明改古制之說也禮經喪服詞旨簡奧得此書以發明之於古聖人制禮之意可謂洞悉其微矣讀四書說凡大學

中庸各一卷論語孟子各二卷說多新穎如子罕篇子見齊衰者冠衣裳者與瞽者編修謂古者大司樂掌成均之法教國之子弟其屬皆瞽矇也凡瞽矇之有道有德者使之教死則祭於瞽宗謂之先師子敬瞽者敬師也鄉黨篇狐貉之厚以居編修謂居所以坐者古人謂坐曰居居吾語汝是也食不厭精膾不厭細編修謂厭飽也同饜又爲憎厭者物過飽則厭也食與膾不以精細之故而加進求飽言其與常食同也式負版者編修謂負版凶服之在後者喪服注凶服前有衰後有負版左右有辟領是也又如孟子梁惠王篇何必曰利編修謂爲國者不爲其利將爲其不利乎天下無不願爲利亦無願爲不利與人同利斯爲仁利不私己斯爲義聖賢所謂利者將盡天下而利之

惠王曰利吾國此其所以不合耳苟盡天下而利之則一  
言利而仁義在焉矣天下皆利吾誰與爲不利天下皆爲  
吾不利吾誰與爲利君子非惡利也惡夫言利己者之適  
以失其利也滕文公篇餘夫二十五畝編修謂圭田餘夫  
皆所以厚君子也圭田教之尊祖餘夫教之收族晉之公  
族有餘子亦其似也古者有祿然後有廟有廟然後有族  
二廟則宗子屬其從父昆弟三廟則屬其族昆弟支子皆  
屬其昆弟宗子主祭支子助祭主祭者益之圭田五十畝  
助祭者半之皆所以奉祭祀焉爾蓋古之教使士大夫同  
廟皆同居同財又使之各有分田以盡其歲時念先之意  
兼寓以卹其私爾庶民則一夫百畝及其時而授之不當  
有餘夫矣其異常解多類此咸豐癸丑之秋

文燦

歸自京

師紆道南豐訪編修於其家維時粵西紅巾賊困南昌編修募勇應援省垣其弟子誠大令以編修所著諸書相贈談至夜分感懷時事惄然憂之編修鄉人治實學者廬陵有蕭學博國珍字崑圃癸酉選拔貢生官南昌府學訓導積書三十年至三萬餘卷與人論說偶及書史入內檢本隨手卽得通世事而自律嚴尙血性重交遊著述甚多不輕示人南城有會舍人協均字笙巢賓谷撫部季子也年未及壯文筆矯健閉戶窮經時多妙悟金谿有黃明經鑣字子覺附貢生年未強仕熟於明史及鄉貫逸事弱冠時讀注疏隨手摘錄各附案語頗有發明自作詩文多至七八十卷高安有朱孝廉齡字芷汀文端公六世從孫也博雅好古嘗私淑顧亭林藏書三萬餘卷顏所居曰古權齋

有明先生集卷之三  
寢饋其中著有夏小正正義林薌溪嘗序之又注其師袁  
穀廉翼遼懷堂駢體文集於明代遺事搜羅極博多補明  
史所未及

經學博采錄卷九終